

ÞJÓNUSTUSAMNINGUR VIÐ TÓNLISTARSKÓLA VEGNA EFRI STIGA TÓNLISTARNÁMS

Reykjavíkurborg vegna skóla- og frístundasviðs Reykjavíkurborgar, kt. 530269-7609 annars vegar og [Nafn skóla, kennitala skóla] hins vegar, hér eftir tónlistarskólinn, gera með sér svofelldan samning í samræmi við reglur um þjónustusamninga Reykjavíkurborgar við tónlistarskóla, samþykktar í borgarráði þann 9. febrúar 2017, með síðari breytingum, samkomulag um stuðning við tónlistarnám og jöfnun á aðstöðumun nemenda til tónlistarnáms, dags. 29. mars 2022 og síðari viðauka, dags. 5. maí 2025 og reglur Jöfnunarsjóðs sveitarfélaga um framlögin, dags. 31. ágúst 2016, sem fylgja sem viðhengi við samning þennan og eru órjúfanlegur hluti hans:

1. gr.

Markmið

- 1.1.** Markmið samningsaðila er að styrkja og efla tónlistarskólanám í Reykjavík.

2. gr.

Fjárframlög

- 2.1.** Reykjavíkurborg miðlar framlagi Jöfnunarsjóðs sveitarfélaga vegna náms á efri stigum tónlistarnáms og er framlag Jöfnunarsjóðs til tónlistarskólans [fjárhæð] kr. á samningstímanum 1. september 2025 til 31. ágúst 2026.
- 2.2** Fjárframlög sem Reykjavíkurborg miðlar frá Jöfnunarsjóði sveitarfélaga eru vegna nemenda, óháð lögheimili þeirra, sem stunda nám í söng á miðstigi, framhaldsstigi og viðbótarnám eftir framhaldsstig og sem stunda nám í hljóðfæraleik á framhaldsstigi og viðbótarnám eftir framhaldsstig (efri stig tónlistarnáms), og greitt er vegna á grundvelli samkomulags, dags. 29. mars 2022, um stuðning við tónlistarnám og jöfnun á aðstöðumun nemenda til tónlistarnáms og reglna Jöfnunarsjóðs um framlögin, dags. 31. ágúst 2016.
- 2.3** Tónlistarskólinn nýtir árlegt framlag til greiðslu kennslu- og stjórnunarkostnaðar í samræmi við þann fjölda nemendastunda sem tilgreindur er í samningi þessum og tónlistarskólinn telur sig að lágmarki geta kennt m.v. heildarframlag.
Árlegt framlag breytist í samræmi við ákvæði 2. gr. samkomulags um stuðning við tónlistarnám og jöfnun á aðstöðumun nemenda til tónlistarnáms, dags. 29. mars 2022 með síðari viðauka. Reykjavíkurborg tekur við hækkuðum greiðslum frá Jöfnunarsjóði sveitarfélaga og reiknar upp framlög til tónlistarskólans.
- 2.4** Gerður er fyrirvari um að miðað er við greitt framlag Jöfnunarsjóðs sveitarfélaga til Reykjavíkurborgar og getur framlagið lækkað verði fjármagn frá Jöfnunarsjóði skert.
- 2.5** Tónlistarskólinn skal innheimta skólagjöld. Skólagjöldum er ætlað að standa undir öðrum kostnaði við skólareksturinn en launakostnaði kennara og skólastjóra, að svo miklu leyti sem rekstrarkostnaðurinn er ekki borinn af styrktarmeðlimum eða annarri fjáröflun.
- 2.6** Tónlistarskólinn ber ábyrgð á að kennsla og önnur starfsemi hans sé í samræmi við þjónustusamning þennan. Skilyrði þess að tónlistarskóli fái fjárframlag Jöfnunarsjóðs sveitarfélaga frá Reykjavíkurborg er að hann starfi að fullu samkvæmt reglum um þjónustusamninga Reykjavíkurborgar við tónlistarskóla, samkomulagi um stuðning við tónlistarnám og jöfnun á aðstöðumun nemenda

- til tónlistarnáms, dags. 29. mars 2022 með síðari viðauka og reglum Jöfnunarsjóðs um framlögin, dags. 31. ágúst 2016.
- 2.7** Tónlistarskólanum ber að fara eftir kjarasamningum sem Samband íslenskra sveitarfélaga gerir við stéttarfélög tónlistarskólakennara á hverjum tíma. Í þessu felst meðal annars að tónlistarskólanum ber að tryggja að mat á menntun og reynslu tónlistarkennara sé í samræmi við ákvæði kjarasamninga.
- 2.8** Tónlistarskóli sem greiðir fleiri stjórnunarstundir en kjarasamningar kveða á um þarf að skila frávikagreiningu til Reykjavíkurborgar en óheimilt er að nota framlög samkvæmt þjónustusamningnum til greiðslu slíks kostnaðar.
- 2.9** Skilyrði fyrir nýtingu framlags vegna tölvunotkunar tónlistarkennara við kennslu er að fyrir liggi skrifleg beiðni tónlistarskóla um að tónlistarkennari leggi sjálfur til tölvu. Að öðru leyti fer um nýtingu framlags vegna tölvunotkunar tónlistarkennara samkvæmt ákvæðum kjarasamninga. Tónlistarskólinn skal skila í árlegri greinargerð samkvæmt gr. 5.5 í þjónustusamningi þessum, yfirliti yfir notkun tölvu í eigu tónlistarkennara sem greitt er fyrir.
- 2.10** Tónlistarskólanum er heimilt að sækja sérstaklega um aukaframlag vegna viðbótarlaunakostnaðar skólans við afleysingar vegna langtímaforfalla tónlistarkennara, sem ekki hafa náð 70 ára aldri, að loknum samfelldum eins mánaðar forföllum tiltekins kennara, sem staðfest eru með læknisvottorði, og að því gefnu að kennarinn eigi rétt á greiðslu launa í veikindum sínum, til samræmis við gr. 5.11 í reglum um þjónustusamninga Reykjavíkurborgar við tónlistarskóla. Gerð er krafa um að áður en tekin er ákvörðun um afleysingu verði haft samráð við skóla- og frístundasvið. Áskilinn er réttur til að synja umsóknum um aukaframlag hafi ekki verið leitað afstöðu skóla- og frístundasviðs áður en til ráðningar kemur.
- 2.11** Framlag skv. gr. 2.1. greiðist með jöfnum mánaðarlegum greiðslum og skal greitt út síðasta virka dag hvers mánaðar (eftirá).

3. gr.

Kennsla og kennslumagn á grundvelli framlags

- 3.1** Kennslumagn á samningstímanum er ákvarðað á grundvelli upplýsinga frá tónlistarskólanum til skóla- og frístundasviðs Reykjavíkurborgar og Jöfnunarsjóðs sveitarfélaga um kennslumagn frá fyrra ári sem var [fjöldi stunda] að teknu tilliti til útreikninga Jöfnunarsjóðs á grundvelli reglna hans.
- 3.2** Tónlistarskólinn kennir að lágmarki [fjöldi stunda] nemendastundir fyrir framlag Jöfnunarsjóðs sveitarfélaga á samningstímanum.
- 3.3** Fjármagn skal að fullu notað til greiðslu kennslu- og stjórnunarkostnaðar og að lágmarki vegna nemendastunda skv. gr. 3.2 í samningi þessum vegna náms á efri stigum tónlistarnáms.
- 3.4** Tónlistarskólinn skal fylgja reglum Jöfnunarsjóðs sveitarfélaga um kennslu og nýtingu kennslumagns og reglum um þjónustusamninga Reykjavíkurborgar við tónlistarskóla þegar reglum Jöfnunarsjóðs sleppir.
- 3.5** Tónlistarskólanum er óheimilt að mismuna nemendum eftir búsetu við inntöku nemenda vegna náms á efri stigum tónlistarnáms.
- 3.6** Framlög Jöfnunarsjóðs sveitarfélaga fyrir komandi skólaár miða við kennslumagn nýliðins skólaárs. Tónlistarskólinn skal skila upplýsingum um kennslu og nýtingu kennslumagns á yfirstandandi skólaári til skóla- og frístundasviðs Reykjavíkurborgar á viðeigandi eyðublaði fyrir 1. mars ár hvert.
- 3.7** Samkvæmt reglum Jöfnunarsjóðs sveitarfélaga er einungis heimilt að telja með kennslumagn vegna náms á miðstigi í söng hafi viðkomandi nemandi lokið að

- fullu námi í söng á grunnstigi. Þá má aðeins telja með kennslumagn vegna sama nemanda á miðstigi í söng í fjögur ár samanlagt.
- 3.8** Samkvæmt reglum Jöfnunarsjóðs sveitarfélaga er einungis heimilt að telja með kennslumagn vegna náms á framhaldsstigi í söng eða hljóðfæraleik hafi nemandi lokið að fullu námi á miðstigi. Þá má aðeins telja með kennslumagn vegna sama nemanda á framhaldsstigi í söng eða hljóðfæraleik í fimm ár samanlagt. Tónlistarskólum ber að afla upplýsinga um námsferil nemenda.
- 3.9** Samkvæmt reglum Jöfnunarsjóðs sveitarfélaga er einungis heimilt að telja með kennslumagn vegna viðbótarnáms eftir framhaldsstig í söng eða hljóðfæraleik hafi nemandi lokið námi á framhaldsstigi að fullu. Þá má aðeins telja með kennslumagn vegna sama nemanda í viðbótarnámi eftir framhaldsstig í tvö ár samanlagt.
- 3.10** Tónlistarskólinn upplýsir í starfsáætlun skóla- og frístundasvið Reykjavíkurborgar um hversu margar nemendastundir hann getur kennt að lágmarki fyrir áætlað framlag Jöfnunarsjóðs sveitarfélaga sem Reykjavíkurborg miðlar.
- 3.11** Tónlistarskólinn ábyrgist að kennsla þeirra nemenda, sem innritaðir eru í skólann, sé í samræmi við lög og reglugerðir og önnur stjórnvaldsfyrirmæli sem áhrif kunna að hafa á rekstur tónlistarskóla. Aðalnámskrá tónlistarskóla skal ávallt liggja til grundvallar náminu, en skólanum er heimilt að leggja áherslu á afmarkaða þætti aðalnámskrárinnar í þeim tilgangi að auka fjölbreytni í tónlistarskólalastarfinu og mæta áhuga nemenda.
- 3.12** Nemendur skulu fá kennslu að lágmarki í samræmi við lög um fjárhagslegan stuðning við tónlistarskóla nr. 75/1985, aðalnámskrá tónlistarskóla, sbr. auglýsingu nr. 529/2000 og reglur um þjónustusamninga Reykjavíkurborgar við tónlistarskóla.
- 3.13** Tónlistarskólanum er heimilt að ráðstafa fleiri nemendastundum en fram kemur í grein 3.2 í samningi þessum en aukin þjónusta skólans hefur ekki áhrif á fjárhæð framlags samningsins, sbr. gr. 2.1 samningsins
- 3.14** Sjái tónlistarskólinn sér ekki fært að uppfylla skilyrði um kennsluskyldu eða þjónustu miðað við forsendur þær er fram koma í samningi þessum skal skólinn tilkynna skóla- og frístundasviði Reykjavíkurborgar það svo fljótt sem verða má. Skóla- og frístundasvið Reykjavíkurborgar mun þá endurskoða fjárhæð framlags og lækka framlagið í samræmi við breyttar forsendur.

4. gr.

Umsókn og innritun í tónlistarskóla

- 4.1** Umsækjendur um nám í tónlistarskóla sækja um það hjá þeim tónlistarskóla sem þeir óska eftir að sækja. Umsókn og innritun er á ábyrgð viðkomandi tónlistarskóla. Reykjavíkurborg áskilur sér rétt til að afla upplýsinga frá tónlistarskólanum um umsækjendur, stöðu á biðlista og skráða nemendur með lögheimili í Reykjavík sem greitt er fjárframlag vegna.
- 4.2** Tónlistarskólinn skal setja sér inntökureglur og birta á heimasíðu sinni. Tónlistarskólinn skal gæta jafnræðis við inntöku nemenda og skulu aðferðir skólans við mat á umsækjendum vera gagnsæjar og aðgengilegar almenningi á heimasíðu skólans. Kostnaður vegna námsins skal tilgreindur með skýrum og aðgengilegum hætti og vera umsækjendum um nám ljós áður en þeir senda inn umsókn sína.

5. gr.

Upplýsingagjöf og eftirlit skóla- og frístundasviðs

- 5.1 Tónlistarskólinn skilar starfsáætlun eigi síðar en 1. júlí ár hvert samkvæmt leiðbeiningum skóla- og frístundasviðs Reykjavíkurborgar til samræmis við gr. 12.1 í reglum um þjónustusamninga við tónlistarskóla.
- 5.2 Tónlistarskólinn afhendir að beiðni skóla- og frístundasviðs þegar eftir því er óskað yfirlit yfir kennara og stjórnendur skólans þar sem m.a. komi fram upplýsingar um laun og kennslu hvers og eins auk upplýsinga um áætlaðan nemendafjölda. Ef um samkennslu er að ræða þarf að tilgreina hversu margir nemendur eru í hóp. Upplýsingum skal skilað á því formi sem óskað er eftir af hálfu skóla- og frístundasviðs hverju sinni, sbr. Tónalaun eða á öðru sambærilegu formi. Auk þess upplýsingar um áætlaðan nemendafjölda, fjölda umsókna, stöðu á biðlista og upplýsingar um nöfn og kennitölur nemenda með lögheimili í Reykjavík og nám þeirra.
- 5.3 Skóla- og frístundasviði Reykjavíkurborgar er heimilt að krefja tónlistarskóla um fjárhagsáætlun fyrir tiltekið tímabil samkvæmt leiðbeiningum Reykjavíkurborgar. Með fjárhagsáætlun skal fylgja yfirlit yfir kennara og stjórnendur skólans þar sem m.a. komi fram upplýsingar um laun og kennslu hvers og eins auk upplýsinga um áætlaðan nemendafjölda. Ef um samkennslu er að ræða þarf að tilgreina hversu margir nemendur eru í hóp. Upplýsingum skal skilað á því formi sem óskað er eftir af hálfu Reykjavíkurborgar hverju sinni.
- 5.4 Tónlistarskólinn sendir skóla- og frístundasviði Reykjavíkurborgar endurskoðaðan ársreikning um liðið fjárhagsár sem gerður er í samræmi við lög nr. 3/2006 um ársreikninga og góða reikningsskilavenju auk skýrslu stjórnar fyrir 1. febrúar ár hvert. Ársreikningur skal gerður á grundvelli skólaársins frá 1. ágúst til 31. júlí Reikningar skulu áritaðir af framkvæmdastjóra (skólastjóra), stjórn félagsins (skólanefnd) og endurskoðendum. Í ársreikningi skulu tekjur af skólagjöldum vegna nemenda á neðri og efri stigum tónlistarnáms sundurgreindar í skýringum þegar við á. Jafnframt skal sundurgreina launakostnað vegna kennslu og stjórnunar sérstaklega vegna neðri og efri stiga tónlistarnáms þegar við á. Sama gildir um aukaframlag vegna langtíma forfalla tónlistarkennara vegna veikinda eða slysa.
- 5.5 Tónlistarskólinn skilar greinargerð til skóla- og frístundasviðs Reykjavíkurborgar um starfsemi síðasta skólaárs samkvæmt leiðbeiningum skóla- og frístundasviðs Reykjavíkurborgar fyrir 1. júlí ár hvert. Í greinargerð komi fram upplýsingar um starfsemi skólans, s.s. fjölda nemenda, fjölda nemenda á biðlista, fjölda kenndra nemendastunda, fjölda kennara og stöðugilda, innritunarreglur og innritunarviðmið, fjölda áfangaprófa, yfirlit yfir eigin tölvunotkun tónlistarkennara, yfirlit yfir tónleika, nýjungar í skólastarfi, upplýsingar um skólagjöld við skólann á mismunandi námsstigum auk afslátta ef um slíkt er að ræða og annað það sem skólar vilja taka fram eða Reykjavíkurborg óskar eftir. Sjálfsmatsskýrsla getur verið hluti af ársskýrslu tónlistarskóla.
- 5.6 Tónlistarskólanum er einnig skylt að veita skóla- og frístundasviði Reykjavíkurborgar allar aðrar upplýsingar um starfsemi og fjárhag skólans og allar þær upplýsingar sem nauðsynlegar kunna að vera vegna rannsókna eða úttekta sem skóla- og frístundasvið kann að framkvæma eða láta framkvæma og varða tónlistarfræðslu í Reykjavík.
- 5.7 Tónlistarskólar skulu skila sjálfsmatsskýrslu til skóla- og frístundasviðs þar sem fram kemur stefna og markmið skóla, skilgreining á leiðum til þess að ná þeim, greining á sterkum og veikum hliðum skólastarfs og áætlun um úrbætur.

Sjálfsmatið skal vera í samræmi við þau viðmið sem sett eru í aðalnámskrá tónlistarskóla um sjálfsmat. Sjálfsmatsskýrsla getur verið hluti af ársskýrslu tónlistarskóla og skal þá vera í sér kafla undir heitinu sjálfsmat skóla.

6. gr.

Vanefndir og leiðréttingar

- 6.1** Komi til vanefnda á þjónustusamningi þessum er heimilt að grípa til hefðbundinna vanefndaúrræða. Sé um verulega vanefnd að ræða er heimilt að grípa til riftunar að undangengnum hæfilegum fresti til úrbóta.
- 6.2** Komi í ljós að skóla- og frístundasvið Reykjavíkurborgar hafi ofgreitt framlag til tónlistarskóla af einhverjum ástæðum, t.d. vegna rangra upplýsinga eða mistaka mun skóla- og frístundasvið lækka framlag til skólans við næstu greiðslu sem því nemur eða krefjast endurgreiðslu. Tónlistarskólinn getur óskað eftir því að endurgreiðslu verði dreift á þrjá mánuði.

7. gr.

Gildistími og áskilnaður um rekstrarhæfi

- 7.1.** Samningur þessi gildir til fyrir tímabilið 1. september 2025 til og með 31. ágúst 2026.
- 7.2.** Óski annar hvor aðilinn eftir því að segja samningnum upp fyrr er gagnkvæmur uppsagnarfrestur þrír mánuðir og miðast við mánaðamót. Tilkynning um uppsögn skal vera skrifleg og afhent með sannanlegum hætti.
- 7.3** Reykjavíkurborg áskilur sér rétt til að ganga úr skugga um rekstrarhæfi tónlistarskóla áður en þjónustusamningur er gerður við skólann og hvenær sem er eftir að slíkur samningur hefur verið gerður ef málefnalegar ástæður eru fyrir hendi. Ef vafi leikur á um rekstrarhæfi tónlistarskóla er Reykjavíkurborg heimilt að hafna samningsgerð við skólann eða eftir atvikum að segja upp gildandi samningi. Til samræmis við lög um ársreikninga nr. 3/2006 skal koma fram í skýrslu stjórnar með ársreikningi ef vafi leikur á um rekstrarhæfi tónlistarskólans.

8. gr.

Þagmælska starfsfólks og meðferð stjórnsýslumála

- 8.1** Starfsfólk tónlistarskóla skal gæta fyllstu þagmælsku um hagi foreldra og barna þeirra sem það fær vitneskju um í starfi sínu og leynt skulu fara samkvæmt lögum, fyrirmælum yfirboðara eða eðli máls. Þagnarskylda helst þótt látið sé af starfi. Brot á þagnarskyldu getur varðað refsingu samkvæmt almennum hegningarlögum.
- 8.2** Tónlistarskólinn skal fylgja ákvæðum stjórnsýslulaga við töku ákvarðana er varða réttindi og skyldur nemenda í tónlistarskólanum.

9. gr.

Fyrirvari vegna breytinga á lögum

- 9.1.** Verði gerð breyting á lögum nr. 75/1985 um fjárhagslegan stuðning við tónlistarskóla, samkomulagi um stuðning við tónlistarnám og jöfnun á aðstöðumun nemenda til tónlistarnáms, dags. 29. mars 2022 eða reglum Jöfnunarsjóðs sveitarfélaga um framlögin, dags. 31. ágúst 2016 er gerður almennur fyrirvari við samning þennan, ef breytingarnar kalla á endurskoðun á einstökum ákvæðum samnings þessa.

10. gr.

Force Majeure.

- 10.1.** Hvorugur aðili verður talinn hafa brotið gegn samningi þessum, þegar honum er ókleift að uppfylla samningsskyldur sínar vegna atvika, sem rekja má til óviðráðanlegra ytri atvika (force majeure), s.s. vegna alvarlegra slysa, stríðsátaka, náttúruhamfara, deilna á vinnumarkaði, fyrirmæla stjórnvalda eða annarra óvæntra og ófyrirséðra atvika, sem samningsaðilum er ekki unnt að fyrirbyggja.

11. gr.

Fjárhagsleg ábyrgð og framsal

- 11.1.** Reykjavíkurborg ber hvorki lagalega né fjárhagslega ábyrgð á rekstri tónlistarskólans.
- 11.2** Samningsaðila er óheimilt að framselja réttindi sín og/eða skyldur samkvæmt samningi þessum, í heild eða að hluta, nema að fyrirframfengnu skriflegu samþykki hins.

12. gr.

Varnarþing

- 12.1** Komi til þess að mál verði höfðað vegna ágreinings um samning þennan skal það rekið fyrir Héraðsdómi Reykjavíkur.

13. gr.

Undirritun

- 13.1.** [Samningur þessi er gerður í tveimur (2) samhljóða eintökum og heldur hvor aðili sínu eintaki. Öllu framangreindu til staðfestu rita til þess bærir fyrirsvarsmenn/fulltrúar aðila nöfn sín hér undir í votta viðurvist.]

[Samningur þessi er undirritaður með fullgildri rafrænni undirskrift í samræmi við ákvæði laga nr. 55/2019 um rafræna auðkenningu og traustþjónustu fyrir rafræn viðskipti og reglugerð (ESB) 910/2014 um sama efni. Með undirritun ábyrgjast viðkomandi einstaklingar jafnframt að þeir hafi umboð til að skuldbinda aðila, með þeim hætti sem samningurinn gerir ráð fyrir.]

Reykjavík XXXX 2025

F.h. Reykjavíkurborgar
vegna skóla- og frístundasviðs Reykjavíkurborgar

F.h. tónlistarskólans

Vottar að dags. og undirskriftum:

_____ kt _____

_____ kt _____

Viðauki I

Reglur um þjónustusamninga Reykjavíkurborgar við tónlistarskóla, samþykktar í borgarráði þann 9. febrúar 2017, með síðari breytingum.

Samkomulag um stuðning við tónlistarnám og jöfnun á aðstöðumun nemenda til tónlistarnáms, dags. 29. mars 2022 auk viðauka dags. 5. maí 2025.

Reglur Jöfnunarsjóðs sveitarfélaga um framlögin, dags. 31. ágúst 2016.